



# Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :

f Tir Yimyim

ig tir\_yimyim

yt tir yimyim

TAPAK 8

Myanmar menoknok lendong nung asür 3,085 jungogo

Asian Cricket Council nung PCB tekolakba Mohsin Naqvi tir kümogo



VOL. XXII ISSUE NO. 170 (ADOK 170) DIMAPUR ROGONÜ FRIDAY)

RONGCHII (APRIL) 04, 2025

₹ 5.00

## Madhya Pradesh nung tamanger-tem anema inyakba aitsür: NPCC

**Dimapur, Rongchii/April 03 (TYO):** Hindutva extremists temi March 31, 2025 nü Jabalpur nung Catholic putir aser tamanger dak züka merenshiba khukhua aitsür, ta Nagaland Pradesh Congress Committee (NPCC) sangdong ka ajanga ashi.

Father Davis aser Father George T dak züka merenshiba densema Khristanpur anema mapa tamajung inyakba ya Constitution of India kübok fundamental rights agüja aliba nung aibelenba lir.

Mandla parish nungi temeshi ainlen jajarterm yimjung nung par tamangba yimsü aser külemkejaba temeden amshia alidang o tamajung shia merenshiba aser teka sangshiba atema temulung nung tip matemer. Bajrang Dal activists temi ozüing alema temeshi ainlen jajarterm aser putir tem khen danga masü anaben pua ayuba yagi region nung tangatetba agi anünga aliba aser tamangba yimsü tsütsü tashiyim amshir tali akumba sayur, ta NPCC

sangdong ajanga ashi.

Parnok chioktsü asoshi police temi inyakba atema pela agizüker, saka Government of Madhya Pradesh dang mapa tamajung inyaker nem tekeraba nung tapet temerenshi agütsüsü ajungshir.

Iba dak alia ano tamangba yimsü tsütsü kin tilatem temeden wazüka ayutsü aser tarutsü nung iba ama timtem majurutsü asoshi mera tajung agitsü akhanger, ta NPCC ajanga ashi.

Madhya Pradesh nung aliba Catholica nunger den onok nokdaka lir aser state sorkar dang secularism aser democracy tangatetba wazüka yua nüburtem sunepa aliba raksatsüsü merangba tashi anema tasü tait mera agitsü ayongzüker.

Nüburtemi tzüzüing-ozüing nung tamang katettsüsa aser kin tilatem temeden wazüka ayutsü asoshi tekeraba nung ozüing agi mela aliba mapa inyaktsü imlar, ta NPCC sangdong ajangasa ashi.

## Nagaland Super League takok ngua ayongzükba tenüngsang agütsür

**Dimapur, Rongchii/April 03 (TYO):** Mezüingbuba Nagaland Super League (NSL) takok ngua tembangtetba asoshi iba asayamung ayonger Chief Minister-i anir Nagaland sorkar, Nagaland Olympic Association, Department of Youth Resources & Sports, Nagaland Football Association, sponsors aser club aser item ketdangsür tem nem tenüngsang agütsür, koba January 28, 2025 nung tenzük aser April 1, 2025 nung tembang, ta Nationalist Democratic Progressive Party (NDPP) sangdong ka ajanga ashi.

Nagaland asoshi mezüingbuba iba ama asayamung tajung takok ngua ayongzüktsü ya tayongzükba tulu liasü, koba state kinük ajungalen nungi meyaritap asübo tamakoktsü süla, saka iba asayamung tepiyong kanga junga ketdangsüba yong NSL takok ngua ayongzüktsü.

State tesem ajungalen iba ama sentong ayongzükba ajanga tarutsü nung lanurtem rongnungi saisapongtsü sempet alitem tali anitetsü aser employment atema sapang agütsüsü NDPP-i tamang akar.

NSL nung football asayatsü sempet tajung alir nübu tasen

aika adokba nguogo aser ano state nung kanga junga amenteta aliba clubs tem den tokteptsü asoshi clubs tasen aika adokba nguogo.

NDPP ajanga iba asayamung takok angur Barak Football Club (BFC) nem tenüngsang agütsür, shirnok Nagaland nung football club tejentem rongnung ka lir aser Longterok Football Club (LFC) koba clubs tasentem rongnung ka aser runners up jenjang tongtet.

NDPP-i ano iba asayamung nung shilem agiba clubs aser parnok managements dang Nagaland nung saisapong takum yutsüba asoshi tenüngsang agütsür.

Taruba NSL nung club timbai shilem agitsü teimla lir.

Ano NSL indang fans aser supporters aser state tesem balala nungi team tem dang NDPP ajanga kangasa pelaba lemsateper, kechiaser nenoki tanen makai menungit asübo NSL mabensala. Fans tem tali timba akumtsü imlar, koba ajanga lanur asayar tali arua shilem agitsü ajungmesotsü. Tarutsü nung NSL tajungtiba kuma ina national aser international clubs tem nungia shilem agitsü imlaa atar, ta NDPP sangdong ajangasa ashi.

## GPRN/NSCN nung Naga Army reunion sentong agi



**Dimapur, Rongchii/April 03 (TYO):** Naga Army ketdangsürtem lenisüba GPRN/NSCN ajanga April 2, 2025 nü Reunion atema tongtipang mera ka agia liasü.

Menüngdakba 'elements' temi teka amoshiba mechi tesüba ita 11 tashi parnok sadanger inyakyim nung tetsükdaktsü ajurua liasü. Ajisüaka parnoki designated Khehoi Camp nung aliba General Headquarters nung Mass Reunion sentong ka ayongzük, ta GPRN/NSCN sangdong ka ajanga ashi.

Iba senden nung telok anaprong nungi 'Top brass

officers' tem dena tawa tebilemstü ajuruba tem koktettsü asoshi meranga inyakba aser parnok indang collective mission tanaben amenokba temaitsü liasü.

Iba mapang Chief of Army, Maj. General Kiyeh Yeptomi aser GSO-1 indang Brigadier Kiyeto Zhimomi tsüngta teka amtepa salemba ya tesendaktep rakdang aliba yanglushiba kisüng masü saka tejakleni aotsü asoshi tashi itshiba, Naga nunger asoshi bendanga agütsüba sayuba liasü, ta sangdong ajanga ashi.

Iba sentong nung GPRN/NSCN Naga Army züngsem 200

dak tema adenshia Naga nunger ajunga asoshi "Asen linük kumzüka ayudang Naga nunger adianutem aser Indian Army kabu nung nisung jenti takum samaogo, aser tanü ka kuma lungjemmer asen linük asoshi nüngdakba mera tekeraba nung agitsü asen kabu nung lir," ta sangdonga Naga political groups ajunga atema kuli ama adianutem tsüngta salemtapa yimjung asoshi tasü ita tejakleni aotsü tejangraba kuli sayua liasü.

Ibai Indo-Naga political solution tekeraba nung bener arutsü asoshi tongtipang mera ka liasü, ta sangdong ajanga ashi.

## Gen. (Retd) MB Neokpao Konyak meyipa meshilangba ratar: GPRN/NSCN

**Dimapur, Rongchii/April 03 (TYO):** Ato Kiloner N. Kitovi Zhimomi-i aniba GPRN/NSCN ajanga tawa sangdong ka nung par telok tiri temang anepalutsü atema ajungbena leave agiba dak sendakba tebilemstü lemsatepa liasü.

Gen. (Retd) MB Neokpao Konyak ya temang nung timtem ajurua mozü kidang anepalutsü nüngdaker ta metetdaksür. Aser pa mapang shidak nung timtem majurui temang anepalutsü asoshi GPRN/NSCN ajanga local civil societies, talisa Western Sumi Hoho aser Western Chakhesang Public Organization (CPO) dang teyari meshia liasü. Item lokti tentet dang pa temang anepalutsü asoshi mozüki matong tashi senzüsempogba nung yaritepa anepalutsü asüngdang aser pa designated camp-i meyipa shilangtsü liasü. Ajisüaka pa pa indang-indanga Thahekhu Village nung aliba Samson'er jurila ki bushia ao aser temang anepaluba sülen meyipa shilangtsü imla aliba melenshi. Iba inyakyim ajanga GPRN/NSCN züngsemtem aser shilem

agia aliba civil society tem rongnung tasüngdangba arur aser tebilemstü akar, ta GPRN/NSCN sangdong ajanga ashi.

Osang balala nung onoki pa tashiyim amshia yua lir ta tai tongloktüsü ya tejangja masü, kechiaser onoki pa kodanga pai memulungi soita mayu. Tir ka ama onoki pa akumtsübor aser Government protocol shidak amshia pa den pa indang personal security guards aser Arms section ka pa meintsü aser pa takum kumzüktsü atema yok, ta ashi.

Ibaji Western Sumi Hoho aser Western Chakhesang Public Organisation tenük kuli lir.

Tang onok Re-union asoshi bendanga agütsür nendaka inyaker. Aser GPRN/NSCN nung 'U' mesüra 'W' nüngja agütsüba mali ta ajaki metettsüla. Ibai Media Fraternity ajanga telok tenüng Unification ta jatettsüba lir. Iba sülen Unification tenüng ya official mesüka NSCN (IM) aser GPRN/NSCN inyakyim bendangtsü mechi Press aser Media nung amshia arur, ta GPRN/NSCN sangdong ajanga

ashi.

Anungji tang NSCN (U) ta jembiba nungya GPRN/NSCN kecha sendaktepa mali. Mezüingbo 'K' ta liasü saka 2012 küm GPRN/NSCN ta melen, aser onoki tang tashi Gen. (Retd) MB Neokpao Konyak ya ozü tir ama züngshir, ajisüaka pa ya pai mulunga asü mesüra memulungi nija kidang (private residence) pua ayuar onoki mejangjateter, ta ashi.

Tribal Hoho (WSH & CPO) lenirtem aser GPRN indang civil workers, shirnok dang pai pa tebilemba lemsatep, parnokba pa temang anepaluba sülen meyipa shilangtsü atatepa lir, ta GPRN/NSCN sangdong ajanga ashi.

Nüburtem den lemsatepba sangdong aser live media report tem ya tejangja masü, yangji ochi mali puratetba lir. Ozü tir anema inyaktsü asübo onoki GPRN/NSCN (NK) sorkar meyong nok-nü ajunga nungnanga melie meshia yula. Saka onoki pa nem item ajak agütsü aser tekeraba nung taneptsü ngur meyipa shilangtsü sarasademtsü aser maneni sarasademtsür, ta GPRN/NSCN sangdong ajanga ashi.

## Manipur nung PR benokba Lok Sabha nung agizük

**New Delhi, Rongchii/April 03 (Agencies):** Manipur nung "President's Rule" benokba jangjashia Brehostibarnü Lok Sabha nung Statutory Resolution ka renema party ajunga nungi züngsem temi iba telemtetba bhukuma liasü.

Iba telemtetba bhukuma nokdakba mapang party balala nungi Parliament züngsem temi state nung tensa junga ketdang masüba atema central sorkar aitsü.

O intepba mapang, Manipur nung akhi ama tensa arudaktsütsü asoshi sorkari nüngdakba mera ajak agiogo, ta Union Home Minister Amit Shah-i ashi.

Manipur nung ita pezü akhi ama süngjema arudar aser yimjung pangzüng ka renemtsü mechi Centre-i Meitei aser Kuki kin den jembishinü tenzükogo, ta pai ashi.

High court order sülen kin balala tsüngta rara tenzük aser iba order adokba anogo onoki central

forces tem tayimtsü nung yok. Onoki menur mapa inyakba mali, ta pai ashi.

Iba mepetmesü ya 2023 küm May ita tenzük aser iba lendong nung nisung 260 asü, ta Shah-i ashi.

Manipur state dak sendakba nung Tiri February 13, 2025 nü Constitution indang Article 356 (1) kübok Consideration of the Proclamation agütsüba House-i voice vote ajanga agizüka liasü.

# CAWD ajanga Tuensang nung DC Office teyangludak semdang



CAWD Assistant Chief Engineer, Sungtiba Amer; Deputy Commissioner, Tuensang, Lithrongla Tongpi Rutsa aser dangar temi April 3, 2025 nü Tuensang nung Deputy Commissioner indang Office Complex teyangludak aliba semdang dang tangokba noksa nung angur.

**Dimapur, Rongchii/April 03 (TYO):** Brehostibarnü Assistant Chief Engineer Er. Sungtiba Amer-i anir Civil Administration Works Division (CAWD) ajanga Tuensang nung Deputy Commissioner indang Office Complex tang teyangludak aliba semdanga liasü.

Pa meina Deputy Commissioner, Tuensang, Lithrongla Tongpi Rutsa aser contractor tem oa liasü.

Assistant CE Er. Sungtiba Amer-i iba tesem semdangba sülen mapa renloka aoba nung temulung süa repringba lemsatap aser Detailed Project Report (DPR) nung shia aliba ama mapa inyaktar ta ashi.

Project terenlok aser quality asadangsü atema department-i iba ama mapa inyakba tesem semdang ta pai ashi aser iba complex ya financial year 2025-26 tsungta renemtsü imlar ta metetdaksü.

Iba project indang osang

tejangja lemsatepdang, G+2 storey complex nungya parking facilities alitsü aser matamabensar asoshi ramps aser metzü meshiba tesem alitsü, ta ashi.

Iba complex nungya conference hall ka alitsü, kong nisung 250-300 asemtsüsa yanglutsü.

Iba project sanction asüba atema Er. Amer-i Chief Minister Neiphu Rio lenisüba kübok Nagaland sorkar nem tenüngsang agütsü aser sorkari Nagaland anüdoklen alir ajangzüksü asoshi sorkari alakteta ranlokba indang lemsatapa liasü.

Iba project atema senotsü ya State Earmarked Special Assistance to States for Capital Investment (SASCI) kübok agütsür ta pai ashi aser Tuensang district nung administrative nungdakba ama tenzüksüsa mapang shidak nung renemtsü imlaba lemsatapa liasü.

General Administration

Department kübok project balala inyakba repringshima semdangsü asoshi CAWD yagi Nagaland nung district balala sema jajatar.

Iba department yagi state tesem ajunga nung administrative buildings aser ki o jen yangluba achayanger.

DC Office yangluba semdangba sülen CAWD ketdangsürtemi ano Tuensang nung mezüngbuba Village Guard (VG) Commandant Office semdanga liasü.

Ibai VG Commandant office mezüngbuba lir aser iba project ya state sorkari sanction asü, ta Er. Sungtiba Amer-i ashi. Iba complex nungya basement, ground floor aser first floor alitsü. Contractor temi meranga inyakba atema Er. Amer-i tenüngsang agütsü aser akok tashi tekeratiba nung Village Guard Headquarters amenoka inyaksü asoshi maneni meranga inyaksü ayongzüka liasü.

# Hostel tasen registration atema form agütsür

**Dimapur, Rongchii/April 03 (TYO):** Directorate of Higher Education kübok hostel tasen registration aginer ajungda dang New Hostel Registration atema forms ya Directorate (Scholarship Section) ajanga April 7-25, 2025 anogotem agütsütsü aser forms ya April 30, 2025 tashinung agütsütsüla, ta Directorate of Higher

Education sangdong ka ajanga metetdaksü.

Anungji Post Matric Students atema hostel lapoker temi latetja aliba mapang arua forms meshitsü akok, ta sangdong ajanga ashi.

Register süa aliba hostel tem ano renew mesüi alirtema mapang shidak nung renew asütsü metetdaksür, aji mesüra

item hostel mali ama züngshitsü.

Scholarship guidelines nung aliba ama Hostel nung alir Post Matric Students atema hostel forms agütsütsü asoshi Department-i iba Hostel Eligibility Certificate ya agütsür. Anungji Hostel Certificate mashi lemming nung amshira pa/ la khuret asütsü, ta sangdong ajanga ashi.

# Social Welfare Department nung ketdangsür den tepila sentong agi



**Dimapur, Rongchii/April 03 (TYO):** Department of Social Welfare, Kohima ajanga Commissioner and Secretary mapa nungi anisüngzük angur Martha R. Ritse, IAS nem akhum agüja tepila sentong ka April 1, 2025 nü Hotel Japfu, Kohima nung ayongzüka liasü.

Sentong nung Joint Secretary, Social Welfare Department, Olemjungla-i Ritse indang otsü tongmelang agi lemsatap, shiba NCS officer ka ama 1991 nung tenzüka liasü.

Liyonga arudang lai District Administration, ARC, Shillong aser ano Rural Development,

Health and Family Welfare, Tourism aser Land Resources ama department balala nung tenzüka arua liasü.

Ritse ya IAS Nagaland Cadre nung 2002 küm züngok aser March 31, 2025 nü mapa nungi anisüngzük angu.

Advisor, Social Welfare, Wangpang Konyak ajanga sentong nung jembidang Ritse nem tenüngsang agütsü aser la arishi küm agi abensa anisüngzük mangu tashi bendanga agütsür Nagaland sorkar tenzüka atema pelaba lemsatapa liasü.

Alun Hangsing, Chairperson,

Nagaland State Commission for Protection of Child Rights; W. Nginyeih Konyak, Chairperson, Nagaland State Commission for Women; Tosheli Zhimomi, Director, Social Welfare, aser Bodeno S. Colo, Secretary, Social Welfare nungeria iba sentong nung o tatsütsü jembia liasü.

Martha R. Ritse, IAS ajanga tepila o jembidang department ketdangsür aser staff temi la den amalitep akaba, tashi angaba aser ajungmesoba atema pelaba lemsatap aser maneni bendanga agütsür inyaksü ajungshia liasü.

# MEYIPA AGIR

Koba Mokochung police-i 5th March 2025 anogo Yajang Lemjen Tuli anasa NSCN Khango telok nungi nisung 5 apuba nungi SS Captain Limaakum S/o Tiajungba Akhoya ta osang kaket aser sangdong balala nung agüja aliba osang ajanga Akhoya tenüng menükja maksütsüba asoshi sasa bilemer aser kinunger temi Akhoya yimden dang tatok meshir, kechiaser Mr.Limaakum ya S/o Lt. Ajungba Phom, Bamynü yimer, par jabaso lir ta kinunger temi nebur tem dang sangdonger.

**Kinunger tenüng nung,**

1. Imlimeren *MeRen*
2. Bangshiba *Plus*
3. Imtitoshi *sp*

# Dimapur Police ajanga metongshitsür

**Dimapur, Rongchii/April 03 (TYO):** Commissioner of Police, Dimapur ajanga April 2, 2025 nü sangdong ka agütsüba nung Iuto indang

designation ya PA ta azüngtsü ayongzüker, ta metetdaksü. Aibelenba asoshi sasar, ta sangdong ajanga ashi.

# AG ajanga pensioner tem dang metetdaksür

**Dimapur, Rongchii/April 03 (TYO):** Principal Accountant General (A&E), Kohima tekeraba nung agütsütsü ajanga pensioner ajunga dang metetdaksüogo.

# Kohima nung North Music Academy semzüko



**Kohima, Rongchii/April 03 (TYO):** Task Force for Music and Arts (TaFMA) chairman, Theja Meru-i April 3, 2025 nü Secretariat Road, Kohima nung North Music Academy (NMA) semzüksüogo.

Iba sentong nung Meru-i jembidang, tawa TaFMA ajanga research mashika agiba mapang state nung music academies 100 dak tema aliba ngutet, koba yimya tajung lir, ta ashi.

Nüngdak ajiteta music academies tali lapoker, ta pai ashi.

State nungi kentenmenür asoshi teimla aser sempet aliba indanga pai lemsatapa liasü.

Neilakuonuo Metha ajanga

iba academy lapokba asoshi tenüngsang agüja jembidang, Bachelor of Music zünger asünung lai Naga nunger lanur nem music courses tajung agütsütsü imlar, ta TaFMA chairman Theja Meru-i ashi.

Iba sentong nung Thejasilie Metha, Pastor, TUBC Tseminyu menden liasü aser Zakiebeinuo Metha, Pastor, Immanuel Baptist Church Kohima ajanga sarasadema sentong tenzüc, Nounengu Whourie ajanga temeja ken ka aten aser Medo-o Chadi, Associate Pastor, Baptist Church Chiechama ajanga sentong tembanga sarasadema liasü.

# NSDMA-i Kohima nung Drone Flying training ayongzüksü

**Dimapur, Rongchii/April 03 (TYO):** Deputy Commissioner, Kohima, B Henok Buchem, NCS ajanga nüburtem dang sangdong ka nung, Nagaland State Disaster Management Authority (NSDMA) ajanga NSDMA, Home Department indang officers aser staff atema Skill Upgradation Training Programme on Drone Flying

ayongzüksü, ta metetdaksüogo. Iba training ya Indira Gandhi Stadium, Kohima Complex nung tzüngsang-mopung apir April ita anogo ter (10) agütsü.

Iba mechi district nung aliba nüburtem, security forces aser police tem dang iba tesem nung drone amshitsü meteta alitsü sangdong ajanga metetdaksü.

### Ato kilonser Narendra Modi 6buba BIMSTEC Summit nung adentsü



April 03, 2025 nü Ato kilonser Narendra Modi Thailand yimtiba, Bangkok tonga aoba mapang nung Deputy Ato kilonser aser Minister of Transport, Suriya Jungreangkit-i pa agizükba noksa nung angur.

**New Delhi, Rongchii/April 03 (Agencies):** Ato kilonser Narendra Modi 6buba BIMSTEC (Bay of Bengal Initiative for Multi-Sectoral Technical and Economic Cooperation) summit nung adentsü atema Brihostibarnü Thailand tonga ogo. Anogo ananü Thailand sendangba mapang nung pai Thailand Ato kilonser, Paetongtarn Shinawatra den-a jurila senden amentsü. Ato kilonser Modi Thailand yimtiba, Bangkok tonga aoba mapang nung Deputy Ato kilonser aser Minister of

Transport, Suriya Jungreangkit-i pa agizükba liasü. Thailand tonga aoba sülen Modi-i X ajanga, "Taruba senden nung shilem agitsü aser India o Thailand na tsungda amalitep jenjang ajungkettsütsü yongyar," ta metetdaksü. Ministry of External Affairs (MEA) otongdar, Randhir Jaiswal-ia X ajanga, Ato kilonser Modi Bangkok tonga ogo, ta metetdaksü. "Ato kilonser PM Paetongtarn Shinawatra @ingshin den senden amentsü

asere 6buba BIMSTEC Summit nung adentsü," ta paisa metetdaksü. Ano PM Office-ia X ajanga, Ato kilonser Modi Bangkok tonga aoba mapang nung Thailand nung aliba India nungertemi pa pelaa agizük, ta metetdaksü. Brihostibar nikongdar Ato kilonser Modi-i Thailand, Myanmar, Nepal, Bangladesh, Bhutan, aser Sri Lanka nungi lenirtem den senden amentsü aser Agreement on Maritime Cooperation tezüngzüktep agitsü atema jembitsü, ta kasa osang ajanga metetdaksü.

### Supreme Court judge temi yimjak nung pei akaba rongsen sangdongtsü

**New Delhi, Rongchii/April 03 (Agencies):** Inyakyim teladak asütsü atema Supreme Court judge temi office tenanzükba agiba mapang nung yimjak nung pei akaba rongsen/kiojen sangdongtsü parnoki melungtepogo. Supreme Court nung judge tem senden amendang parnoki pei rongsen aser kiojen osang tejangja sangdongtsü aser item osangji SC website nung upload asütsü telemtetba agi. Ajisüaka Supreme Court website nung pei kiojen

sangdongtsüji pei sasa melungteta inyaksüla, ta Supreme Court website nung shia lir. Chief Justice of India, Sanjiv Khanna densema judge 30-i pei kiojen osang sangdongtogo. "Supreme Court nung judge temi office tenanzükba agiba mapang nung pei akaba rongsen osang tejangja sangdongtsü, iba denji külemi kiojen tasen alisemba mapang nunga iba osangji Chief Justice nem metetdaksütsü," ta SC website ajangasa metetdaksü.

### Lok Sabha nung Waqf (Amendment) Bill, 2025 agizükogo



Ahmedabad nung Social Democratic Party of India (SDPI) züngsemtemi Waqf (Amendment) Bill anema longkak aيتدang tangokba noksa nung angur.

**New Delhi, Rongchii/April 03 (Agencies):** Brihostibarnep Lok Sabha nung Waqf (Amendment) Bill, 2025 agizükogo; senden nung ruling NDA-i iba bill pusem aser opposition MP temibo iba bill ya Muslim nungertem anema lir, ta shia iba bill anema nokdak.

atema o entepdang Union Home Minister Amit Shah-i, "Kasa züngshiba temeden tembangogo mesüra yimsü balala tsungda bendangshidanga züngshitsü mesüra Muslim nunger yimsü temeden nung tiyongtsü aitsü, ta jembirtem dang ni ya shiner- iba amaji kodanga mataloktsü," ta ashi.

Iba bill nung inoksemtsü atema opposition züngsemtemi benokba onüktem voice vote ajanga kata magizükba sülen iba bill agizük. MP 288-i iba bill pusema vote agütsü aser MP 232-i iba bill anema vote agüja liasü.

"Yimsü dak sendakba rejutem nung sorkari tiyongtsü maitsü. Kü dang ya shiang-CAA benokba sülen Muslim nunger kwi dang nungi senso temeden agien? Kata magien. CAA dak sendakba nung nenoki nüburttem dang yazü jembiba atema nenoki tatok meshitsüla," ta paisa metetdaksü.

Waqf (Amendment) Bill kübok Waqf tribunals tashi itshitsü, züngsemtem shimba inyakyim latettsü aser kümsük latettsü.

Congress MP, Gaurav Gogoi-i, "Iba bill ya asen linük temzüng alema lir, federal inyakyim anema inyakba lir aser nükjidong pezü nung benokba lir- temzüng tashi meitdaksütsü atema, minority nüburttem tenüng menüktsütsü atema, India nunger loktiliba nung telemsa adokdaksütsü atema aser minorities temeden agientsü atema lir. Iba ya Waqf kiojen aziüktsü atema lir. Tanü parnoki minority telok ka dak tenük yoker aser asungbo parnoki ano tanga telok dak tenük yoktsü," ta metetdaksü.

Sen lakh ka dak tali aazükba Waqf institutions auditors-i audit agitsü.

SP nungi Akhilesh Yadav-i, "Waqf Amendment Bill indang inyakyim mesüra nükjidongji ka danga tim masü. Iba ya nisung aika meyong ali aser kiojen rakzüktsü atema asalentong yangluba lir. Iba bill ya ajanga BJP-i tongbang nung tamakok angutsü, kechiyong tang iba bill pusemer züngsem aikati tema nung inyaker saka telung nungbo melung masü lir," ta ashi.

Waqf kiojentem ketdangtsütsü aser inyakyim teladak asütsü atema centralized portal ka benoktsü. Iba bill ajanga 2013 jakdang aliba temzüngtem tanaben benoka pei kiojen Waqf nem agütsütsü atema tajemba agi küm 5 Muslim nungertem dang melatsü, Waqf sangdong magütsüdangyongi tetsürtem nem senmang agütsütsü, aser amitsürtem, balar alir tetsürtem aser lajarthem atema-a maangka balala agütsütsü.

Sorkar kiojentem Waqf meyong, ta shia agiba ken oji district collector aser iba dang nungjagi temaba ketdangsertemi bushisüngdangtsü aser Central o state Waqf boards nung Muslim nunger masüba züngsemtem-a shimoktsü.

Lok Sabha nung Waqf bill

### Mamata-i Ram Navami benjung tesünep nung amongtsü ayongzükter



**Kolkata, April 03 (Agencies):** Brihostibarnü Trinamool Congress tongti lenir aser West Bengal Chief Minister, Mamata Banerjee-i state nung nüburttem dang Ram Navami benjung tesünep nung amongtsü aser olulu mamangtsü mepishia metetdaksü. Hindu nungertemi April 6 nü (Amongnü) Ram Navami benjung amongtsü. BJP aitsüba olen ka nung Mamata Banerjee-i, iba telok ya tiyazü telok ka lir, aser parnok nükjidongji yimsü nung ajemdaker linük nung telemsa adokdaksütsü atema lir, ta ashi. State Secretariat nung osangbenertem den jembidang lai, "Ni yimsü balala amanger

ajak dang Ram Navami mapang nung tesünep meraksatsü, olulu mamangtsü aser kanga küm küma alitsü ayongzükter," ta metetdaksü. "Ni nenok dang rara nung shilem magitsü mepishir. Ya metetang- ibaji parnok tebilemba sentong asütsü. West Bengal nungbo asenoki tiyazü party (BJP) masü saka Ramakrishna aser Vivekananda nunger tesayuba sülen dang anidaksü. Iba dak alia tanga benjungtem nunga timtem tagütsü," ta laisa metetdaksü. "Yimsüji nija ka meyong, saka benjungtemjibo ajak atema- ibaji bilemtetang. Sikh nungertemi kotari amer rally agir - nenokia rally agitsü akok

saka police tetuyuba tashi angatsüla aser timtem magütsütsüla," ta laisa metetdaksü.

Mamata Banerjee-i, April 9 nü lai Jain nungertemi ayongzükba sentong ka nung shilem agia adentsü, ta metetdaksü.

Mamata Banerjee-i Chief Minister menden nungi anenogo ta olulu prokba dak sendakba nung lai, "Iba dak sendakba nung ni FIR ka benokogo," ta metetdaksü.

"Ni CM menden nungi anenogo, ta parnoki olulu ka prokogo. Parnoki digital media ajanga item ama tiyazü osang proker. Onoki FIR ka benokogo," ta lai metetdaksü. Left party tem-a aija Trinamool Congress (TMC) tongti leniri, Left party temi BJP den tangatettep nung inyaker, ta ashi.

"Ni Left party tem nungi lenirtem aika akhümstübur, ajisüaka election atongba mapang nung BJP den temba ayimer lenirtembo akhüm metsübur. Ni parnok dang ya shiner- right wing tangatetbaji pei party tangatetba den memeyokteptsüla, mesüra nenok mopung nung samatsü," ta laisa metetdaksü.



## TIR YIMYIM YIMOBILEM (EDITORIAL)

DIMAPUR FRIDAY, APRIL (RONGCHII) 04, 2025

### Kinunger kangshia piladaktsüba

**T**anü India o Myanmar na tsüngda nisung shinga mejajatetsüsa lung tsüki atsütsü asoshi India-i lemtetba ya Naga nunger asoshibo Naga nunger kibong ka linüseta India-i arua kangshia balatsütsü meranger amai lir. Ibayongji, Naga nungertemi tang dang masü saka India yimten nüchiso ngur külen mezüng ato kilonser Jawarlal Nehru aser Burma ato kilonser U Nu nati India aser Burma na tsüngda arrtsü yokbaji temeteta memetet aser tagizüka magizük. Aji oda, Naga nunger o Burma nunger na kidanger, anungji kin ana tsüngda arr long azüngtsübaji tim saka Naga nunger kar India kübok aser kar Burma (Mynmar) kübok ta lemdanger alima matem tashi kinunger agi pi bendanger kümer lidaktsütsüsa atongtsübaji nisungi nisung mezüngmeshiba mapa tuluka asütsü. Atangji, Naga nungertem rongnungsa asüyonga Konyak, Khamnungan aser Tangkhul kintem dak alaka tangar kintembo ajak India kübok lir saka item kin asem yabo kar Myanmar aser kar India nung ta kasa yimten kübok külemi linüseta melitet timtem aika ajangshia arudagi. Ashiko, India aser Myanmar lima na prongla nung lemdanger aliba Naga kintem dakji alaka tanga Naga kintemibo India aser Myanmar na tsüngda lung tsüki agi arr ladangtsüba mapa tenzüka inyaka oa aliba ya shishia mebilemtsüa akok, ajisüaka tang Mynmar kübok Naga lima alibaji India kübok alir Naga nungertem asoshi nüngdak mapang jenokdaksa aruogo aser tarutsü nunga Naga limasa asütsü. Kasaji, tang India kübok aliba Naga limatem yaa Myanmar kübok alir Naga nunger asoshi teyari angudak tesem tajung ka kümogo aser tarutsü nunga ajak asoshi Naga lima ya Naga limasa asütsü. Iba tangatetba nung Naga nungertemi akhidang nungi British nungertem danga aser India nungertem danga alushi agi tangjema aliba Naga kintem ajak yimten yimsüsüba ka kübok külemi alitsü asoshi onok mulung sudakjang ta jembia aruogo. Ajisüaka, British nungertemia Naga nungertemi agütsüba ken o nung kecha telangzüba magütsüi India ket nung toktsür ao aser India nungertemia Naga nunger ali kiburtemi memetet ser Myanmar den tapi agi arr ladanga toktsüba agi, tanü tashi Naga nunger o Naga nunger na tsüngda tangari arr long yoka toktsüba magientet timatemer. Tesasatsüka, tanü tashitemetet putu nunga Naga nunger India aser Mynmar arrtsülen alirtembo tashitemetet, libaliro aser awashi nung tangar memenep ano junga nisung küma maruba tia nung lir. Iba jagi pei kinunger tsüngda külemi ngutepa melitettsüsa tangari long jara yokdi asüyonga, Naga nunger aikati ola madoker, kechiyong parnoki India o Mynmar na tsüngda long tsüki agi arr ladang nung kechi koda parnok asoshi timtem aser takoksa ajurutsüar memetet. Iba ama mapang ka nung, Nagaland state government-ia India aser Myanmar na tsüngda lung tsüki agi atsüdangtsüba mapaji magizüker ta metetdaktsüba telemtetba aser lokti tentetemi iba mapaji anentsü asoshi India government nem takangba agütsüba jagi India-ia Naga nungertem taginüba dang masü saka temeten dena angateter alitsü imlar. Aji oda, tang Naga Peoples' Front (NPF) teloki anir Longwa aser Pangsha len India government-i Myanmar o India na tsüngda long tsüki atsütsü mapa tenzüka anema lokti senden ayonga jajabaji yimten mapa shitak ka inyaka jajadagi ta repranger. Kasaji, tanga yimten telokia nübertem nem tangatetba agüja jaja nungbo koda jungla. Tanü asüng, ajak kanga mazüng, anungji nübertem nem tang amai nüngdak maparen nung tangatetba agüja jajar mali. Aji oda, Naga yimten nüchiso bushir telok paikaya küma oaga, nübertem den Naga yimten ken o jembia jajarbo telok ka danga mali kümogo. Aji oda, Naga nunger kibong tiyong nung lung jara agi arr ladangtsüba sentong yabo yimten telok ka tenüng nung masü saka Naga nunger ajak tenüng nung Naga nunger yimkong ajurutepdak telongjem tajung kati ayongzüka aka nungang tebilemtsü agi Naga nunger asoshi temoatsü mapang ka küma amshitetsü.

## OLEMSABANG

### NENOK ANEMA O BENDANGTSÜSA NENOKI O TEBENDANG

~ L.Kika Pongener.

(Yashi adok nungi...)

Tesasatsüka, tanü putu nung lokti nung lennir karbo supokrem agi tenuk pokadoker, rongsen agi tebang nembangtsür, nisung'er aküm-sentsü-ket dak tsükdaker, lokti teimba/telok tuluba dak temulong ulur, aibelena olepdang agütsüba, tashiyim agi olepdang agütsüba, tashiyim agi atsür aotsü merangba...Aser iba ama tashiyim inyakbaji, temenen, aibelen aser tai masü amai bilemba lennir karbo alitsü akok. Yisu-i "Kechiba nenoki nenok tenuk nung aliba anak tuluji mungui yur ne adianu tenuk nung aliba anak tilaji ajir"...ta ashibaji iba amala lennirtem dang ashir sudi ta angateter. Tsüngrem o-i ashir..."Nai ochi mezütoktsüla, tejak mereprangtsüla, supokrem magitsüla, kechiyung supokrem agi shisa akar tenuk pokdaktsür aser temeshipur o zütoktsür" (T.Künem-16:19). Tesasatsüka, tanü lennir aika supokrem nung alanger ochi nung menokdakba agi asen lokti shirangdaktsür.

Anungji sorkar-i ayuba obendangdak sabang (Court) nungi obendang agütsübaji dang obendang agütsüba ta mangatetli, saka aseni aniba/tenzüka lokti balala nung, lokti-senden aser mongdang nung, asenoki olepdang agütsüba ajak ya obendangdak sabang nungi obendang agütsüba den kecha tepila mali asütsü. Anungji asenoki ochi nung olepdang agütsür asü (?) Mesura tashiyim agi ajepbanger olepdang agütsür (?)...ta khen kanga junga shisadangdi. Aseni olepdang agütsübaji ashiko, lokti teimbai hau ta ashitsü akok aser agizüktsü akok...Ajisuaka, Tsüngremi hau ta ashitsü asü mashitsü...??? Tsüngrem o-i ashir..."Tamajung inyaksü atema nai telok teimba sulen tanitak; mesura telok tuluba tsütsülen obendang meyipdaktsütsü atema merangba mapa nung nai tejembi" (Anitet-23:2). "Nisunger lenmang shiaji pei nukdangpo shitak lir; Saka Kibubai temulongjang odanger" (A.Shin-21:2). Asenoki aseni aniba lokti nung olepdang agütsübaji nisung tsüngdang dang temeden angutsü asü (?) Mesura Tsüngrem tsüngdanga temeden angutsü...??? Asen mapaji asen mulongjangi aitsür asü maittsür...??? ta kanga junga shisadanga olepdang agütsütsüla. Aji oda, tsüraburi tasen achiba agi chirnur aser semchi-semnur tashi tepo mejemtsü.

Lennir aikati lokti senden aser mongdang nung, pei taginuba nukjidong kar atongtsü merangdang, pei tebilemba kar ataloknudang aser pei temeden aginudang, metetsümonga tashiyim agi o-lepdang agüja alitsü akok. Aji oda, tashiyim agi telemtetba agiba nung kodanga tatempang mekümtetsü aser nutsüng-nubur yimjung nung longjema/sunepa malitsü. Temzüng-ozüng agi azüoka tashiyim agi longjemba nungjibo tema tazütsü longjemba dang asütsü. Asenoki aiben tashiyim agi olepdang agütsüba (Might is right)-ji ochi/shitak amai bilemer, aser iba sabang-jibo obendangdak sabang masü ama bilemer. Ajisuaka, aseni aniba lokti sabang nungi olepdang agütsübajia obendangdak sabang (Court) ka nungi obendang agütsüba den tepila mali asütsü. Aji oda, koba lokti nung sudir suang...Koba ama sabang ka nung sudir suang...Kechi ken o nung sudir suang...Asenok ochi/shitak tangatetba nung indang-indanga nokdaka lira...Asenoki ochi kuli agütsütsü kecha arendaka tsübuja malitsü. Ajisuaka, asenok nokdakdakji ochi nung nokdaka melira asenoki tasü maittsü aser arendaka tsübuja bilemtsü...Anungji loktiliba ajunga nung lennir ajaki asenok anema Tsüngremi o mebendangtsüsa kanga shisa kaa olepdang agütsütsüla. Aji oda, obendangdak sabangji temenen masü...Saka asenoki aibelena obendang aser olepdang agütsübaji dang temenen asütsü.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## Yaküm Israel nung Khristanem anema inyakba tatalokba 111 liasü



Israel nung tanur kati Khristanem dak metzü metsüloksüdang tangokba noksa nung angur.

**April 03, 2025:** Israel nung Khristanem anema inyakba kanga bulua akümer; yaküm küm kija nunga Israel nung Khristanem anema inyakba tatalokba 111 liasü, ta Rossing Center for Education & Dialogue indang report ajanga metetdaksü.

"Attacks on Christians in Israel and East Jerusalem" ta ajaba report ya taoba Brihostibarnü Rossing Center-i sangdonga liasü.

Rossing Center ya Yirusalem nung amenoka lir aser iba organization yagi Israel nung Khristanem, Yihuda nungertem aser Muslim nungertem tsüingda tesendaktep tajungba akümtsü atema inyaker.

Rossing Center nung züngsemtemisa yaküm December ita nung agiba survey osang ka metetdaksü. Yirusalem nung aliba Notre Dame of Jerusalem Center nung osangbenertem den jembidang parnok iba survey osang metetdaksü.

2024 küm Israel nung Khristanem anema inyakba tatalokba 111 nungjagi 46 bo Khristanem dak metzü metsüloksüba, tenük amtsü mozü khaloktsüba mesüra azükba tatalokbatem liasü. Tatalokba 35 bo Arogo meyong kiojen raksatsüba, rongdoktsüba mesüra kürakyanglu raksatsüba tatalokbatem liasü.

Tatalokba 14 bo public signs raksatsüba, tatalokba 13 Khristanem amokmerenba aser tatalokba asembo Khristan yimsü dak sendakba temaitsütem agientsü tuyuba mesüra tekülem sentong nung adentsü nokdangba liasü.

Rossing Center report ajanga, "Khristanem anema inyakba tatalokba teimbaka metzü metsüloksüba liasü. Item ama mapa ya yimjak nung odiodia inyaker. Joko tangbo yimjak nung yimsü lenirtem amokmerener, talisa Yirusalem yimti tejenba nung yimsü lenirtem kanga amokmerener," ta metetdaksü.

Khristanem anema inyakerteremji teimbaka Orthodox Yihuda nungertem lir aser takoksa angurtemji teimbaka Khristan putirtem lir, kechiyong parnokü süboba süoshi ajanga parnok Khristanem ta melamela jangjar, ta report nung shia lir.

Ajisüaka 2024 küm tajung kaji- joko aikati item ama tatalokbatem ya ketdangsertem nem metetdaksütsü melunger, aser ibaji ajanga ketdangsertem dak melung lemetetba aser parnok den amalitepa inyakba sayur, ta report nung shia lir.

December 22, 2024 nü Central Bureau of Statistics report ajanga ashiba agi, tang Israel nung Khristan nütsüing 180,300 shi lir aser ibaji linük nütsüing shilem 1.8 dang lir.

Israel nung aliba Khristanem shilem 80 bo Arab nung Khristanem lir.

Ano külen Rossing Center indang survey report ajanga Israel nung Khristanem aser Yihuda nungertem tsüingda tesendaktep mejungi aliba metetdaksü.

Iba survey nung shilem agirtem shilem 48-ibo iba region toktsür aotsü tebilemba lir ta ashi. Iba survey nung nisung 300 dang asüingdangyaa liasü. Parnok shilem 34 bo Arab Khristanem liasü aser shilem 23 Israel nung Khristanem liasü.

Israel nung loktiliba dak sendakba nung tasüingdangba balala langzüdang Khristan shilem 30.8-i lokiliba nung parnok agizükteter ta ashi aser Khristan shilem 34-ibo loktiliba nung parnok magizükteter ama bilemer, ta ashi.

Iba survey nung shilem agir Khristan 10 shia nungi katibosa tangari amokmerenba parnokü ajangshiogo ta ashi. Shilem 58.5-i parnokü Khristan yimsü dak sendakba temaitsü sadoksadoka agiteter ta ashi.

2024 report ajanga Rossing Center-i Israel nung ketdangsertem aser lenirtem dang school tem nung Khristan yimsü indang tesayuba

agütsütsüla, ta mepishi.

Yaküm-a Rossing Center-i report ka ajanga, Israel nung Khristan lenirtem aser Khristan yimsü nung mongintemi temeshi lima (Israel) nung Khristanem tetsübu nung aliba metetdaksüogo, aser iba ya ajanga loktiliba aser yimtenren tsütsü temelenshi aliba sayur, ta metetdakja liasü.

"Tesem kar nungbo akhidang nungi Khristanem anema inyaker, ajisüaka tangbo tesem aika nung Khristanem anema tesempa agi inyakba kanga bulua atalokdar," ta parnokü metetdaksü.

2023 küm nunga Israel nung Khristanem anema inyakba aser Arogo kiojentem amakba tatalokba aika liasü. Item rongnung Khristanem amokmerenba, Khristanem leper raksatsüba, Khristan lenirtem aser temeshi ainlen senzür Khristanem süia aoba mapang parnok anasa metsü metsüloksüba densema lir.

Rossing Center-i, 2023 küm Israel nung Arogo kiojen amakba tatalokba 32 liasü, Khristanem amakba tatalokba tenet, Khristanem amokmerenba tatalokba 11, Khristan leper raksatsüba tatalokba ka aser putirtem aser temeshi ainlen jajartem dak metzü metsüloksüba tatalokba 30 liasü, ta metetdakja liasü.

"Tesüiba küm aika Yirusalem nung metzü metsüloksüba ya yimya ka ama liasü saka tangbo ozüing alema inyakerterem metetsümonga Arogo lenirtem, temeshi tesemtem aser temeshi ainlen jajartem dak metsü metsüloksür," ta parnokü metetdaksü.

Iba dak alia Israel nung missionary mapa inyakerterem aser Yihuda nung Khristan yimsü dangi meyipdaksütsü merangertem dak mersü tzü khaloktsüba kanga bulua ataloker. Talisa Yirusalem yimti tejenba nung Yihuda nung kanga longsoa aliba kiyongtem nungbo Armenia Khristanem anema inyakba tatalokba aika lir.

## ANOGO ABEN TSÜNGREM DEN

## Teyakyak Khristan Yimsü

~Mathi 28:16-20

Asenoki teyakyak Khristanem aser azümesen Khristanem jembiba tawa tanü kanga bulua jembiba angashir. Iba mapang ya azümesen Khristanem timba ama lir. Arogo nung züngsem aika akümer saka arogo mapa nung temulung agüja inyaker ishika dang adoker. Asenok nem züingdangba yanglutsü magütsü saka züngsem züingdangtsü agütsü. Tebilemetsüji kechi?

Mapa kaji aikati Kibubai mulungba nung Pa tenzüksüba masü, asenok mapang, küm züingdanga tenzüksü sapur. Tsüingrem mapa nisunger bilemba aser tashi nung inyaktsü tamakoktsü. Anungji Kibuba mapang nung Pa tenzüksüji tongtipang ta asenoki angatetsüla. Pa mapangji tejangja. Khristai tongmelang agi iba mapang agütsü: Nenoki oang aser kin ajak nütsüing kümdakjang, Tebur, Techir aser Tanela Temeshi tenüing nung baptijang, Ni nenok dang melaba ajak amshitsü sayuang. Mt. 28:19:20. Tasen Lai Khristan yimsü teyakyak liasü. Parnoki Yisu sayuba ajak amokmeren aser rishikangshi metsübu sayu.

Sarasadem: Temeim Tsüingrem aser Kotaker Tebu, Ne lima nung Khristanemi nendaka mapa inyaktsü Nai aginer ta ni metet. Nai mulungba toktsür kü tejangraba nung tali temulung agütsüba ni nangzüker. Iba merumeru tebilemba kü dang yimlibilema tokang. Iba lima purtem meimtsü aser pelaseta Ne osangtajung parnok den lemsateptsü aser meimtsü kü dang yariang, Yisu tenüing nung. Amen.

## US nung telok kari India nung Khristanem anema inyakerterem yarir

**April 02, 2025:** Tawa Dr. Jules Gomes-i ocet ka ajanga US nung aliba Hindu organization kari India nung Khristanem anema inyakba Hindu organization nem senotsü teyari agütsür, ta metetdaksüogo.

Tawa Dr. Jules Gomes-i sayaba report ajanga ashiba agi, US nung charity telok ama register süa aliba Hindu organisations kari India nung Khristanem aser tanga minorities anema inyakba Hindu teloktem nem dollar sen million aika agütsür.

"Transnational Funding in Hindu Supremacist Movements" ta ajaba report nungji India nung Hindu teloktem dangi America nung sen jenti yokba indang shia lir. Iba Polis Project indang documents nungji, teyari mapa balala inyaktsü ama sayua India dangi sen aika yokba aser ibaji Hindu supremacist organisations, talisa Rashtriya Swayamsevak Sangh (RSS) aser Vishwa Hindu Parishad (VHP) ama teloktemi amshiba shia lir.

Item organisations yagi minorities anema inyaktsü aser Dalit (untouchables) aser tribal Khristanem tanaben Hindu yimsü dangi meyipdaksütsü atema senotsüji amshir, ta

document nungji shia lir.

Gomes indang ocet nungji Hindutva (Hindu nationalism) coalition US Wing-i Tir Donald Trump indang MAGA movement aser India Ato kilonser Narendra Modi den tesendaktep junga yua lir, ta metetdakja lir.

Gomes ocet ajangasa, RSS den affiliate süa aliba charity telok teneti 2001 küm nungi 2019 küm tashi nung parnok sentong balala nung dollar sen million 158.9 indok aser senji teimbaka India nung aliba Hindutva teloktem nem agütsü, ta metetdaksü.

Kasa ocet nungsa Modi administration-i Foreign Contribution (Regulation) Act kübok melungtet telok 20,000 indang registrations thinentüba metetdakja lir.

Gomes-isa, Hindu supremacist teloktem den tesendaktep junga aliba Vishwa Hindu Parishad of America densema telok pongui U.S. Small Business Administration nungi COVID-19 relief atema dollar sen 833,000 nguogo, ta metetdaksü.

Dr. Jules Gomes-i University of Cambridge nungi biblical studies nung Doctorate angu. Tang pa Rome nung amenoker Vatican-accredited journalist ka ama inyaker. Pai kakat pongu züluba den ocet jenti zülüogo.

AO OSHI ANGAZÜKDAK:

TANÜ ANGAZÜKTSÜBA OJANG

Tembatinu

(n) medemsor (friendship)

\* Asen alidak tembatinu yimteta ayutsüla.

Tembong

(n) süngküm aser au agi yangluba tzü züoka ayuba pongdang (bamboo water container)

\* Akhidangbo kidang tembong nung dang tzü tadena ayu.



OLONG PAITEP # 7112

Grid for Olong Paitep # 7112 with numbers 1-15 in various positions.

TIPILEN

- 1. Balaka - (5)
6. Aika shirangba - (4)
7. Tar tatsü - (6)
9. Nenü'er jabaso - (4)
10. Sen lateltsüba - (7)
11. Tangar kübok alir - (4)
14. Lon nung inokba - (6)
15. Tzü ayimdak - (4)
16. Ajok - (5)

LANGTSÜNGLEN

- 2. Hai sür inyak - (4)
3. Aor tenüng ka - (6)
4. Ali telungi talangka lur - (5)
5. Tebang kenyongi mazüoker - (4)
8. Ken atema anenzükertem - (5)
9. Toktepa noktak - (5)
10. Sen - (6)
11. Benjong agi - (5)
12. Telung nung rizünga ayu - (4)
13. Tebang nung enok - (4)

OLONG PAITEP # 7111 TELANGZÜBA

TIPILEN :

- 1. Aben, 4. Artsü, 7. Lisem, 8. Liwa,
9. Sarasadem, 12. Aket,
14. Mangu, 15. Anünü, 16. Ango.

LANGTSÜNGLEN :

- 1. Aruli, 3. Balala, 5. Suwar,
6. Belem, 9. Sujuk, 10. Aonung,
11. Dokan, 13. Tinu.

NAI-A YA METETTER MA

Taoba mapang Manipur Minister aser Ukhrul district kübok Chingai Assembly Constituency nungi MLA Dr Khashim Ruivah, mapang talangka shiranga lir, arishi küm 86buba nung Regional Institute of Medical Sciences, Imphal nung süogo. Manipur nung Naga nung linir ya 2000 küm Federal Party of Manipur (FPM) candidate ka ama mezüng shima liasü. W. Nipamacha-i aniba sorkari pa Council of Ministers nung züngoksema liasü. Pa 2007 küm ani Independent candidate ka ama shima liasü.



Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

MP WR Kharlukhi-i taoba CM Biren Singh aitsü



Guwahati, Rogchii/April 3 (Agencies): Taoba NPP state tir aser Rajya Sabha MP WR Kharlukhi-i, taoba Manipur Chief Minister Biren Singh-i tawa asür PA Sangma indang jembiba aitsüogo aser ashiba agi, iba ya pa office nungi aginba atema tezü adangba temaitsü lir.

Kharlukhi-i, Singh ya tezüdang agi sünga aliba nisung ka ta ashiba den, pa atema aria bilemba lemsatepogo, kechiyong Singh-i tawa jembiba ya pa Chief Minister mapa nungi aginba atema jashiba ajanga jembiba lir. "Pai jembiba nung kecha tagitsü tongtibang mali," ta Kharlukhi-i ashi.

Asür P.A Sangma ya linük meimba India nung ka liasü, ta Kharlukhi-i ashi, shiba taoba mapang lenirtem den ya inyaka liasü.

Biren Singh-i social media ajanga PA Sangma aser par

jabaso, Meghalaya Chief Minister Conrad K. Sangma na aitsüba indang osangbenertemi asüngdangba mapang Kharlukhi-i iba olen ya lemsatepa liasü.

"Pai state mapang talangka yimsü asü saka takok ngua yimsü mesütet aser par state nung yimjung bener marutet. Ya pai kechi jembirba?" ta Singh-i par state junga yimsü mesütetba indang tetshia Kharlukhi-i ashi.

NPP-i Singh dang tatok meshitsü takhangba agütsüba dak sendakba nung Kharlukhi-i, "PA Sangma ya shinga dena medemdangtsü makok. Biren Singh-i tatok meshitsüba ta asüba tetezü ya dena mangateter asütsü. Pai Northeast nung iba amala tongtibang nisung ka anema yamai jembitetra pai iba ojang tetezü ya kechi aji memetet alitsü tejangja," ta ashi.

Singh-i lenirtem aitsüba ya Manipur nung Kuki nung MLA tenet NPP nung adenba dak sendaka lir asü ta asüngdangba mapang Kharlukhi-i ashiba agi, pa joko iba amala party jenjang ken o tem nung shilem magir.

Iba ken o ajanga Meghalaya Chief Minister Conrad Sangma aser Biren Singh na tsüngda social media nung yimden yimsüsüba tsütsü mepetmesü tasen ka tenzüka liasü.

Manipur densema Northeast nung kin o kin tsüngda mangatetep adokba ya Singh-i PA Sangma dak tai tongloksüba atema Conrad Sangma-i aitsüba sülen iba mangatetep ya tenzüka liasü.

Kasa mapang nung Singh-i, Manipur nung tang mangatetep adoker aliba ya pei ajangzüksü atema amshir ta shia Sangma aija liasü.

Mizoram nung tourism jenjang tajungba akümer

Aizawl, Rongchii/April 3 (Agencies): 2024 küm linük kübok tesem balala aser bendanglen nungi alima penzü 52,000 dak temai Mizoram semdangogo.

Akashvani Aizawl-i state tourism department data ka lemsatepba mapang, taoba küm state-i alima penzü 52,235 aru, kong linük kübok tesem balala nungi nisung 42,184 aser bendanglen nungi nisung 10,051 densema liasü, ta metetdaksü.

Department data ajangsa, United States, Britain, Japan,

asur Israel densema linük 14 nungi bendanger alima penzü 3,884 densema alima penzü lakh 2.19 dak temai 2023 küm April ita nungi 2024 küm March ita tsüngda state semdanga liasü.

2022-23 nung alima penzü lakh 2.22 dak tema liasü, kong linük nungi alima penzü 2.18 aser bendanger 3,551 densema liasü.

Ketdangsurtemi ashiba agi, alima penzütem ya alinük reprangtsü, shishilembatsü, kinunger semdangtsü aser tanga

nüngdaktem atema arua liasü.

Covid-19 wara pokteter aliba mapang 2020-21 küm alima penzü 20,564-i state semdang aser 2021-22 küm lakh 1.32-i semdanga liasü.

Taoba küm alima penzütem timbai Aizawl semdangogo, kong linük nungi 24,559 aser bendanglen nungi 8,22 densema liasü. Aizawl sülen linük nungi 5,500 aser bendanglen nungi 497-i Champhai district semdang aser domestic tourists 2,714 aser bendanger 75-i Lunglei semdanga liasü.

Manipur nung temesepba mozü shibelener 3 apu

Imphal, Rongchii/April 3 (Agencies): Manipur nung central aser state forces na senteper temesepba mozü shibelener asem den soap case 26 nung sen crore 4 alang brown sugar bena lia puogo.

Meita aoba mapang security forces temi Myanmar nungi state-i temesepba mozü shibelener aruba mapang amshiba gari ana pua liasü.

Ketdangsurtemi ashiba agi, nisung aser temesepba mozü ya Bodhbarnü Manipur antiolentiplen tesem balala nung pua liasü.

Security forces-i, Moirang-

PS, Bishnupur District kübok NH-2 nung Naranseina aser Sunusiphai na tsüngda meita aoba mapang Kairang Mamang Leikai, Imphal East District nungi Md. Faiju Rahaman (40) pua liasü.

Parnoki pa ket nungi Brown Sugar soap cap 12 nung bener lia ngutet aser pai ania aliba gari dena pua liasü.

Tanabuba meita aoba sentong nung Assam Rifles-i, soap case 14 nung brown sugar bener lia nisung ana puogo. Itangitertemi osang agütsüba dak ajemdaker Chandel district kübok Tuitong aser Sehlon na

tsüngda nisung ana ya pua liasü.

Osang tejangja angazükba sülen parnoki mobile vehicle check post ka amenok aser gari ka sota kanga junga bushisüngdanga liasü.

Parnoki gari boot telung nung soap cases 14 nung brown sugar meima bener aliba nguteta liasü. Iba sülen ketdangsurtemi nisung ana ya apu.

Ajisüaka parnoki aibelenertem tenüng mesangdong aser ken o maneni bushisüngdangtsü atema tena ya Molcham police nem bendanga agütsüogo.

### International Criminal Court nungi Hungary atsüinginer

**Budapest, Rongchii/April 3 (Agencies):** Hungary sorkari International Criminal Court nungi atsüingintsü atema telemtetba agiogo, ta Bresthostibarnü metetdaksü.

Israel PM Benjamin Netanyahu, shiba apusü atema ICC-i tetuyuba agütsür lir, pa Hungary atongba sülen mapang tatsüka lir iba osang ya sangdonga liasü.

Right-wing Hungary Ato Kilonser Viktor Orban-i, taoba küm November ita Budapest semdangtsü atema Israel Ato Kilonser jaoka liasü. Gaza nung rara mapang aibelen mena ta shia ICC-i Netanyahu apusü tetuyuba agütsüba sülen anogo ka lir Orban-i Israel PM ya jaoka liasü.

Israel-i iba taitsuba ya magizük aser ashiba agi, iba ya yimden yimsüsüba aser anti-Semitism ajanga jangrudaksüba lir. Parnoki ashiba agi, nüburtemi shimba lenir kati pei linük kümzüka ayutsü atema pei temeden beshiba atema apusü tetuyuba agütsüba ajanga International Criminal Court legitimacy samaogo.

Hungary ya ICC ngutetertem rongnung ka lir

aser shitakbabo okadaki apusü atema tetuyuba agütsür aliba nisung ka pua agütsütsüji parnok mapa lir, saka Orban-i iba obendang ya Hungary-i akümtsüba masütsü ta jangja jangja metetdaksüogo aser ashiba agi iba ya agizüktsü makoktsü.

Hungary-i, 1999 küm ICC indang founding document nung sign asü aser 2001 küm asadangshia liasü, saka iba ozüing ya mebenok.

Orban indang chief of staff Gergely Gulyas-i November ita ashiba agi, Hungary-i ICC indang Rome Statute asadangogo, saka Hungary temzüing ozüing nung shilem ka mekümdaksü aser iba tetezü Hungary yongtsü nung okadak inyakyimtem benoka minyaktetsü.

Bresthostibarnü Gulyas-i state news agency MTI dang ashiba agi, sorkari nikonksütsü tashi nungbo ICC nungi atsüingintsü atema inyakyimtem tenzüka inyaksü.

U.S. tir Donald Trump-i February ita court indang prosecutor Karim Khan nem tenokdangba agütsüba sülen Orban-i, ICC nungi Hungary atsüingintsü akok ta shia liasü.

### Myanmar menoknok lendong nung asür 3,085 jungogo



**Yangon, Rongchii/April 3 (Agencies):** Hopta ka shi tejakdang menoknok tesashi ka agi Myanmar kongshiba sülen asür 3,085 jungogo, ta military sorkari metetdaksüogo.

Lendong nung yirurtem aser jenbortem nem medical teyari aser tejenokdak agütsütsü atema humanitarian aid teloktem aritepa inyakdar.

Military-i sangdong ka ajanga ashiba agi, lendong nung nisung 4,715 yiru aser nisung 341 samar bushidar.

Hokolbarnü 7.7 magnitude menoknok ka anokba epicenter ya Mandalay yimti anasa liasü. Menoknok yagi ki, lenmang aser apu aika raksaja liasü.

Lendong nung asürtem indang osang ya local media nung sangdongba dang nungi ketdangsürtemi sangdongba ishiba lir. Kasa mapang nung tesem aika nung telecommunications raksar asünung asürtem ya tang dang nungi timba akümtsü imlar.

World Health Organization-i ashiba agi, menoknok lendong nung mozüki pezü aser health center ka ajunga raksago aser ano mozüki 32 aser health centre 18 terara raksar lir.

India aser Russia o Belarus nati amenokba mobile hospital tem Mandalay nung inyaksangshidar.

Menoknok anokba sülen

nisung aika talidak maka kümogo aser ano aika pei ki nungi pilar lir, kechiyong aftershocks ajanga ki chireptsü tsübua bilemer. Iba amala mapang ka nung Naypyitaw nung mapa inyakerem tatsük nung kima süki tululu süzükdar.

Myanmar nung 2021 küm military-i Aung San Suu Kyi-i aniba sorkar atsüingtoka mepetmesü tulu nung aliba mapang tang menoknok anokba ajanga tensa tamajungba kümdaksüogo, kong nisung million 3 dak tema pei talidak toktsür aotsüsa kümogo aser iba masüdang nisung million 20 shi teyari nüngdaka liasü, ta United Nations-i ashi.

### Israel-i anüing ajanga Damascus aser Hama amak



**Tel Aviv, Rongchii/April 3 (Agencies):** Israel military tayimtsütemi Syria yimtiba Damascus aser Hama province makogo, ta Israel army aser local media sangdong balala ajanga metetdaksüogo.

State meyong Syrian Arab News Agency (SANA)-i ashiba agi, Israel nunger tayimtsü temi Bodhbarnü linük yimtiba kübok Barzeh tesem nung scientific research centre aser Hama yimti nung airport maka liasü.

Israel military-i item tesemtem amakba jangjashitsüogo aser ashiba agi, parnoki Hama yimti nung Syria military tamendakdak aser Homs' T4 military airport den Damascus nung military infrastructure tem makogo.

Taoba küm December ita Syria tir Bashar al-Assad atsüingtokba sülen Israel-i, Syria kübok tesem balala aiben makogo aser Golan Heights nung United Nations-i meita aliba buffer zone-ia sepaitem yokogo.

Al-Assad-i linük yimsüsüba

aliba mapang Israel-i Syria mapangshia makogo aser ashiba agi, parnoki Iran aser Hezbollah pur tamendakdak amaker.

December 8 nü al-Assad atsüingtokba sülen Syrian Observatory for Human Rights (SOHR)-i, Barzeh nung research centre ka Israel-i amakba sangdonga liasü. Israel-i ashiba agi, iba centre ya guided missiles aser chemical weapon tem yanglutsü atema amshia liasü.

SOHR-i ashiba agi, Israel military-i 2024 küm December 8 nungi December 31 tashi nung anüing ajanga Syria kübok tesem balala 500 dak temaben amak aser taküma 43 ben shi makogo.

United States densema anüolen aliba linüktemi 2018 Ministry of Defence facility ya makogo aser ashiba agi, iba ya Syria indang "chemical weapons infrastructure" dak sendaka lir.

Taoba ita Israel-i ashiba agi, parnoki T4 military base ya anaben tashi makogo.

### Haiti nunger meyirejang aikati longkak ait

**Port-au-Prince, rongchii/April 3 (Agencies):** Linük yimtiba tuluba ka aser iba yimti temeket amokbanger aliba ozüing alema inyaksangshiba teloktem inyakyim aser sorkari parnok nokdangtsü makokba atema Haiti nungertem kanga tezü danga Port-au-Prince nung longkak aita liasü.

February ita tom nungi Haiti nung ozüing alema inyaksangshiba teloktemi azütokshi lendong aika bener arutsüdar. Item teloktem yagi Port-au-Prince shilem 85 amokbanger lir aser United Nations-i ashiba agi, taoba mapang mazüokteti aliba tesemtema parnoki maka nüburtem amokmerendar.

Item teloktem ya Viv Ansanm ta nüngja agütsür teloka ka kübok longjemogo aser parnoki nisung million ka dak tema pei kidangi nungi mintokogo aser iba ajanga linük rongsenketzüing nung kongshioigo aser nüburtem aika ya tzüra agi menepogo. Parnok ya rakzükrakdemba, tetsürtem dak tashiyim beshiba aser nisung tepsetba atema aitsür lir.

Transitional sorkari tang tashi nung item teloktem nokdangtsü atema jenjang tapet agia mali.

Bodhbarnü nungi longkak



aitertemi lenmang nung tenokdangtsü balala tokja gari senzüsenspong minprongla liasü. Parnok Presidential Transitional Council (CPT) aser Ato Kilonser office leni ao saka police-i mintoka liasü.

Parnoki ketdangsürtem aitsüogo, shirnoki CPT amenokba sülen küm ka jungnüa aoer saka tang tashi nung jenjang tapet magiteti arudar. CPT ya Ato Kilonser Ariel Henry-i mapa toktsüba sülen amenoka liasü.

"Nenoki kechi ataloker ya angur mangur?" ta longkak aiter Joseph Mackendy-i Reuters news agency dang ashi. "Tanü Haiti nungertem nüjiso atema raratsü. Onok

shinga kübok mali. Ni item nisungtem ya metsübur."

"Linük tekümzüka kübok maliba ya joko onoki magizükteter," ta ano longkak aiter kati ashi.

Mirebalais jila nung tepuokdak rakpoka tepuokertem jenshiba sülen anogo ka lir nüburtemi longkak aita liasü.

Deobar aonung nungi Hombarnü tashi item teloktem yagi Mirebalais nung police station aser tepuokdak maka liasü.

Iba jila den ano Saut d'Eau amakba sülen nisung 5,981 pei ki toktsür jenshia aotsüsa kümogo, ta International Organization for Migration-i ashi.

## Sangtemla Ward aser Dilong Ward final asayatsü



Santemla Ward aser Sungkomen Ward tsungda 6th Mokochung Inter-Ward Football Tournament tanabuba Semi Final asayadang tangokba noksa angur.

**Mokochung, Rongchii/ April 03 (TYO):** 6th Mokochung Inter-Ward Football Tournament tanabuba Semi Final asaya Santemla Ward aser Sungkomen Ward tsungda kanga dang merutepa asayaogo.

Asaya tenzükur minute 38 buba nung Sangtemla telok nungi jersey no-15 Bapen-i goal-1 metsüoktsü saka minute 43buba nung Sungkomen telok nungi jersey no-19 Medemmar-i goal-1 yokteta telok ana kasasa aküm aser iba sülenbo anisüngzükba mapang agi.

Tanaben ground-i aiter asayaba mapang minute 43 buba nung Sangtemla telok nungi jersey no-2 Opanngtemjen-i goal-1 yokteta par telok takoklen aküm. Iba sülena ano maneni minute 48buba nung Sungkomen telok nungia jersey no-7 Tarepnungsang-i goal-1 yoktet nung telok ana tanaben kasasa kümshi.

Telok anaprongi takok angutsü merangtepa asayatep aser iba mapang kanga dang tia ka-a minute 65 buba Sangtemla telok nungi R.Achi-i goal-1

yoktet nung Sangtemla Ward-i goal 3-2 agi Sungkomen Ward kotteta Final asayatsü jenjang ngutetogo.

6th Mokochung Inter-Ward Football Tournament Final asayatsü nükjidong nung merangtepa asayatepdang telok anaprongi Refree ajanga tim masüba puteta Sangtemla telok nungi Bapen aser Sungkomen telok nung Imnasünep tena Yellow Card achi.

**05-04-2025 Final Match**  
2:00 PM - Sangtemla Ward  
Vs Dilong Ward

## UK nung 2035 Women's World Cup asayatsü



Gianni Infantino

**Rongchii/April 3, 2025 (Agencies):** United Kingdom nung 2035 Women's World Cup asayatsü kechiyong iba asayamung atema bidder tem rongnung UK kija temsüa liasü, ta Fifa tir Gianni Infantino-ashi.

England, Scotland, Wales aser Northern Ireland nung longjemer World Cup ayongzükba asayatsü atema tejangraba aliba March ita benoka liasü.

Fifa rotation rules kübok iba asayamung ya Europe mesüra Africa nung asayatsü tata liasü.

Spain indang federation tir Rafael Louzan-i taoba hopta

ashiba agi, Portugal aser Morocco den longjemer bid asütsü atema parnoki inyaktepdar.

Ajisüaka asayamung ayongzükba asayatsü atema tejangraba aliba lemsateptsü atema tatabangbuba anogo Hombarnü liasü aser Infantino-ashi agi, 2035 atema UK kijai bid süa liasü aser United States nung 2031 küm iba asayamung ayongzükba asayatsü.

"Bidding inyakyim nung shilem ka ama onoki 2031 atema bid ka agizük aser 2035 atema valid bid ka agizükogo," ta Infantino-i Belgrade nung Uefa

congress ka nung ashi.

"2031 küm atema bid ya United States of America aser Concacaf züngsem kar aser 2035 bid ya Europe aser home nation tem nungi liasü.

"Anungji 2031 aser 2035 küm Women's World Cup ya linük tulu kar nung asayatsü aser iba ajanga tetsür football asaya tali ajungkettsü," ta pai ashi.

FA chief executive Mark Bullingham-i, "Fifa Women's World Cup 2035 atema bid asü rongnung onok kija dang liasü.

"Küm tatem tashi nung bid tajungtiba benoktsü atema tang nungi mapa meranga inyakttsü," ta paisa shisem.

2035 World Cup atema formal bid ya asükwa benoktsüla aser 2026 küm Fifa congress ka nung vote agiteptsü.

Infantino-isa, 2031 Women's World Cup nung team 48 asayatsü ta shiogo, koba 2027 küm tashibo team 32 dang asayatsü.

UK-i bid asüba ya tejangja kümra 2035 Women's World Cup ya 1966 küm England nung tebur World Cup ayongzükba asayaba sülen home nations nung asayaba World Cup tanabuba asütsü.

## 2025-26 season atema India team

## asayamungtem sangdongogo

**Rongchii/April 3, 2025 (Agencies):** Board of Control for Cricket in India (BCCI)-i Bodhbarnü sangdong ka ajanga, 2025-26 season nung India senior tebur team kidang asayamungtem mapanglem sangdongogo, koba 2025 küm October ita tenzüktsü.

"Home season ya West Indies den October 2 nü Ahmedabad nung IDFC First Bank Test series asaya-a tenzüktsü. Iba asayamung nung tanabuba aser tatabangbuba Test asaya ya Kolkata nung October 10 nü nungi tenzükba asayatsü.

South Africa aser India na tsungda tanabuba Test asaya Barsapara Cricket Stadium, Guwahati nung asayatsü. Assam nung tang mezüngbuba International Test asaya ka ayongzükba asayatsü lir.

"India team South Africa den format asemprongla asayaba asayamung ka asayatsü. South Africa den IDFC First Bank Test series ya otsüsütsüsa asütsü, kechiyong Guwahati nung mezüngbuba Test asaya ka ayongzükba asayatsü lir.

Asayamung ya November 14 nü New Delhi nung tenzüktsü aser Guwahati nung tanabuba test asaya November 22 nü nungi tenzükba asayatsü," ta BCCI sangdong ajanga metetdakttsü.

Taruba season India team kidang Test pezü, One-Day Internationals asem aser T20Is pongu asayatsü.

West Indies aser India na mezüngbuba Test asaya Ahmedabad nung October 2 nü nungi 6 nü tashi asayatsü aser iba sülen tanabuba asaya Kolkata nung October 10 nungi 14 tashi asayatsü.

Maneni South Africa den mezüngbuba test asaya New Delhi nung November 14 nungi 18 tashi asayatsü aser tanabuba Test Guwahati nung November 22 nungi 26 tashi asayatsü.

South Africa densa Ranchi, Raipur aser Vizag nung ODI asem November 30, December 3 aser December 6 nü asayatsü aser Cuttack, New Chandigarh, Dharamsala, Lucknow aser Ahmedabad nung Decmeber 9, 11, 14, 17 aser 19 nü T20I pongu asayatsü.

## PCB tekolakba Mohsin Naqvi Asian Cricket Council tir kümogo



Mohsin Naqvi

**Rongchii/April 3, 2025 (Agencies):** PCB tekolakba Mohsin Naqvi-i Asian Cricket Council (ACC) tir mapa agizükogo.

Naqvi, shiba 2024 küm February ita nungi Pakistan Cricket Board (PCB) mendenbuba lir, pai iba mapa April 3 nü agizükba liasü.

"Asian Cricket Council tir mapa abentsü kanga tushia bilemer," ta Naqvi-i ashiba ACC sangdong ka ajanga metetdakttsü. "Asia ya alima nung cricket asaya temulung lir aser iba asaya renloka odaktsütsü aser alima ajunga nung prokshia yoktsü atema board züngsem ajak den longjemer inyakttsü ni bendanga agütsür lir," ta pai ashi.

"Ajak senteper asenoki maongka tasen lapokyonga aotsü, tali tajungba longjemshitsü aser Asia nung cricket asaya temaba jenjangi ajungkettsü. Ni taoba ACC tir danga pa lenisüba aser pai ACC asoshi inyaka toktsüba ajak

atema tenüngsang agütsür," ta Naqvi-i ashi.

Naqvi-i, Sri Lanka Cricket (SLC) tir Shammi Silva melenogo. "Asian Cricket Council tir mapa inyakttsü ya maongka tajung ka liasü. Board züngsemtemi longjemer bendanga agüja inyakba ajanga ACC temaba jenjangi ajungketogogo. Ni kü jakdang inyaksang Jay Shah shiba tang ICC mendenbuba lir pa danga kanga pelar. Pa lenisüba nung ACC-i alizung tasen aika tongtetogogo, kong ACC Asia Cup commercial rights tematiba ajangzükttetba aser Asia nung cricket asaya maneni renloka aotsü atema lenmang lapoktsüba densema lir. Ni iba menden toktsüba mapang Naqvi lenisüba nung ACC maneni tejakdangi aotsü ta tamang akar," ta Silva-i ashi.

Naqvi lenisüba nung ACC tarutsü tajungba k asoshi yongya atar, ta kasa sangdong ajanga metetdakttsü.

**BILEMDANGANG**

"Tetsübu agi nisung ka amokseper."